

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 73 (1988)

Heft: 29

Artikel: Gruppaziuns e cuminonzas religiusas (finizun)

Autor: Sievi, Sep Fidel

DOI: <https://doi.org/10.5169/seals-881691>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Gruppaziuns e cuminonzas religiusas

(finiziun)

da sur Sep Fidel Sievi

3) *La baselgia neo-apostolica*

La «Baselgia neo-apostolica» ei seformada suenter ils onns 1860. Quella cuminonza religiusa ei sortida dalla «Baselgia catolica-apostolica» (mira sura: II. Cuminonzas specialas, Ischi semestril, nr. 28, p. 44). Ins era desistius ils onns 1860/63 da eleger puspei novs apostels ella «Baselgia catolica-apostolica» suenter la mort da plirs «apostels». Differentas cuminonzas dalla veglia baselgia el nord dalla Tiaratudestga ed en Hollanda han dad ellas anora numnau novs apostels e caschunau cheutras ina separaziun. All'entschatta han ins dau a sesez il num «Allgemeine Christliche Apostolische Mission». Suenter in'ulteriura separaziun ei seformada ina nova cuminonza che porta dapi igl onn 1907 tochen ozildi il num «Neuapostolische Kirche» – «Baselgia neo-apostolica».

Igl ei stau in da quels neo-apostels, F.W. Schwartz, che ha surpriu la part hollandesa ed ha dau las directivas per quella nova cuminonza, surtut quei che pertucca la fuorma dils survetschs divins. Il svilup dalla baselgia neo-apostolica duront ils decennis suandonts san ins veser en connex cun il temps dil prem-apiestel (Stammapostel) ual en uffeci. Suenter la mort da F.W. Schwartz ha Fritz Krebs surpriu igl onn 1895 il tgamun sco cau dalla cuminonza. El ha consolidau quei uorden d'in prem-apostolat e dau a quel, vul dir a sesez, ina posiziun zun autonoma ed autoritara. Suenter sia mort, igl onn 1905, suonda il prem-apiestel Hermann Niehaus, in um ch'ha giu grond success el propagar e derasar il moviment dils neo-apostolics. Igl onn 1930 suonda lu Johann Gottfried Bischoff, oriunds d'ina famiglia roman-catolica. Naven digl onn 1951 ha quel annunziau, sin fundament d'ina visiun, ch'el vegni duront sia veta aunc a veser il Cristus che tuorna, il giuvenessendi. Quei prem-apiestel ei denton morts igl onn 1960 ella vegliadetgna da 89 onns. Naturalmein ha quei fatg caschunau ina greva crisa ella cuminonza neo-apostolica. Pliras gruppaziuns han priu distanza dalla cuminonza principala. Ins ha denton surventschiu ils problems cun declarar ch'il Tutpussent hagi ord motivs buca enconuschents midau siu meini pertucont il giuvenessendi. Ins ha elegiu in niev prem-apiestel ella persuna da Walter Schmidt. Quel

ha lu surdau siu uffeci igl onn 1975 ad Ernst Streckeisen ch'ei momentan sesents a Turitg.

La «Baselgia neo-apostolica» vesa sesezza sco cuminonza elegida e la suelta vera Baselgia! Quella preferenza declar'ins tras igl uffeci apostolic. Cheu, en quei uffeci, ei, tenor lur perschuasiun, il Cristus presents e tras ils apostels annunzia Dieus sez siu «plaid per nies temps».

Mo tras il prem-apiestel ed ils auters apostels – momentan dat ei en quella cuminonza rodund 60 apostels – sa la sontga Scartira vegnir declarada autenticamein ed endretg. Era il salit e spindrament, tutta grazia, san ins retscheiver mo tras quella hierarchia. Tras la sigillada che succeda cun l'imposiziun dils mauns d'in apiestel retscheivan ils cartents il s. Spért. Quei act vala, sper il Batten e la s. Tscheina, sco sacrament.

Ils neo-apostolics vesan sesezs sco baselgia culminonta, q.v.d. sco baselgia tenor la veglia dil Cristus ch'ei ussa seformada per ils «davos dis», pia preparada per il giuvenessendi. Mo en ella semuossa igl uffeci apostolic ella fuorma cumpleina e caracteristica. Da cheu anora pren quella cuminonza ina clara distanza da tut las otras baselgias cristianas. Perquei appartegn la baselgia neo-apostolica era a neginas organisaziuns ecumenas.

L'entira «Baselgia neo-apostolica» cumpeglia momentan rodund in milliun commembers; en Svizra ca. 40 000. Ella ei derasada surtut egl intschess da lungatg tudestg sco era ell'Africa dil sid.

Surtut la veta activa en las cuminonzas pintgas dalla «Baselgia neo-apostolica» ha siu effect attractiv. Quei san ins dil reminent constatar tier quasi tuttas gruppaziuns e cuminonzas religiusas. Cheu sesentan ils commembers pri si ed appellai persunalmein per in pensum u l'auter. L'anonimitad e distanza che regian savens en las baselgias popularas (grondas) paran da svanir cheu e far plaz ad in sesentir sco famiglia.

4) *Perdetgas da Jehova (Jehowas Zeugen)*

La societad dalla tuor da guardia (Wachtturm-Gesellschaft) ha sco fundatur il marcadont american Charles Taze Russel (1852–1916). Entuorn ils onns 1870 ei Russel, che veva sez giu ina strentga educaziun ella doctrina da Calvin, s'alliaus cun ina grupper parziala dils Adventists. Dalla formazion religiosa ch'el ha retschiert leu derivan certas ideas e tenutas ch'el ha mantenu duront si'entira veta, p.ex. la mod'e maniera d'expliar la Bibla sco plaid directamein daus da Diu che lubescha neginas declaraziuns exegeticas; il calcular e quintar ils temps cun cumbinaziuns

da cefras ord la Bibla; la refusada dalla ductrina dalla ss. Trinitad e da l'immortalitat da l'olma. Beingleiti rimna Russel sper quella gruppia adventista in agen cerchel biblic d'amitgs a Pittsburgh ell'USA.

Suenter ch'ils Adventists havevan pliras gadas predetg in termin per la fin dil mund (1872/73, 1874 e 1878) – ed ei fuva buca schabegiau enzatgei extraordinari – sedistacca Russel dil tuttafatg da quels e fa sias atgnas calculaziuns: El predi igl onn 1914 sco entschatta dil reginavel da melli onns ed organisescha ina cumionza religiusa independenta. Igl onn 1879 entscheiva el cun l'edizion dil fegl «Zion's Watch Tower», la Tuor da guardia da Zion; pli tard porta quella scartira mo il num «Tuor da guardia» (Wachtturm). Tras quei mied da communicaziun seformeschian lu plaun a plaun cerchels biblics, era numnai «Reuniun».

Russel annunzia: Igl onn 1874 ha il temps final dils davos 40 onns entschiet ed igl onn 1914 vegn Jesus Cristus a turnar per la fin dils temps. Suenter che l'uiara mundiala ei bein rutt'ora igl onn 1914, mo che Jesus Cristus ei buca semussaus sco quintau e spitgau, han ins puspei dividiu ora auters datums (1918 e 1925). Pli tard vegn ei lu pretendiu: Jesus ei tuttina vegnius igl onn 1914; el ha mo – per ils carstgauns ussa buca vesivels – ascendiu siu tron en tschiel. Ils onns entuorn 1970 vevan ins puspei quintau ora che 1975 vegni ad esser il tierm final dils 6000 onns dalla historia dalla carstgaunadad.

Quellas calculaziuns buca severificadas han naturalmein menau pliras gadas quei moviment religius en perfetg e difficultads. Il successur da Russel, Joseph Franklin Rutherford († 1942), ha capiu da menar vinvon la caussa tras annunziar novs schabetgs ed organisar gl'entir moviment autruisa. Dapi igl onn 1931 porta el il num «Perdetgas da Jehova» (Jehowas Zeugen).

Quella societad «teocratica» – aschia numna ella sesezza – ei organizada tenor strengas directivas, da sura e pretenda absoluta submissiun ed obedientischa. Dapi Rutherford ei mintgin, pia mintga perdetga da Jehova, responsabels ed obligaus per la vendita da scartiras e litteratura dil moviment. Mintgin ha da vender litteratura, da dar perdetga dalla cardientscha – sch'e fa da basegns era tras il marteri – e da conquistar novs commembers.

Da cheu anora san ins capir la considerabla activitat da quellas «perdetgas»: Tras visetas ellas casas tochen siaden el davos uclaun e tras offerir e vender lur scartiras ton sco mo pusseivel.

Dapi il tierz president e cau da quella secta, N.H. Knorr, vul dir dapi 1942, ei mintga territori sigl entir mund partgius en per la lavur missiunaria dallas «Perdetgas da Jehova».

La Bibla vala sco sulet fundament per tutta ductrina sco era per la veta insumma. La Bibla ei inspirada da Diu, plaid per plaid. Ins dat gronda peisa sin entginas scartiras dil Veder Testament, surtut nua ch'ellas surveschan per mussar si certas doctrinas gia fixadas avon ni ch'ellas ein adattadas per las differentas calculaziuns e prognosas per la fin dils temps.

Sco Diu tutpussent vala mo Jehova! – Dil reminent: Quei plaid ei ina modificaziun dil num per Diu «Jahvé» ch'ins sa leger schi savens el Veder Testament. Tenor ils linguists hebraics po quella noziun «Jehova» buca constar. – Il Spért sogn vala per las Perdetgas da Jehova sco forza da Jehova, denton buca sco persuna. Jesus ei il medem sco igl arzaungel Michael; el ei veramein daventaus carstgaun, ei morts vid in pal (buca vid ina crusch!) ed ei levaus da mort en veta mo spirtalmein, buca cun siu tgierp. Entuorn igl emprem d'october 1914 ei Cristus vegnius intronisaus en tschiel ed ha entschiet la battaglia encunter las pussonzas dil satan.

La historia dalla carstgaunadad va cun gronds sbargats encunter la fin dil mund, encunter la battaglia finala e totala da «Hermagedon» (Pal 16, 16). En quella battaglia apocaliptica vegnan tuttas naziuns, baselgias e tuts sistems da finanzas liquidai; mo las fideivlas «Perdetgas da Jehova» vegnan protegidias. Suenter Hermagedon suonda il reginavel dil paradis da melli onns, vul dir temps e caschun per la davosa decisiun per Jehova.

Quellas profezias cuntexnan el medem mument smanatscha ed invitaziun: «Era ti sas surviver Hermagedon ed entrar en in niev mund, sche ti . . .!»

Ina ductrina speciala dallas «Perdetgas da Jehova» pertucca il diever da saung en spisas, en conservas ni medicaments; era las transfusiuns da saung vegnan refusadas.

Ins accepta buca il batten d'affons pigns, era buca la confirmaziun e la creisma, buca las festivitads da Pastgas e Nadal. Biars usits religius populares ein dismess.

Las «Perdetgas da Jehova» ein tenor il diember dils adherents la secta la pli derasada sigl entir mund. Igl onn 1976 han ins dumbrau 2 248 390 commembers activs en 210 tiaras e naziuns dil mund. La centrala mondiala ei a Brooklyn/New York. En Svizra mutta la cefra da commembers activs a rodund 10 000 ch'ein uni en 206 communitads. Era en nossas regiuns vegnan representants da quei moviment da temps en temps e van dus a dus cun lur «missiun» e lur scartiras da casa tier casa.

Ina collaboraziun el senn ecumen ei, viu dallas «Perdetgas da Jehova» anora, buca pusseivla; quei seresulta ord ils suranumnai puncs da lur ductrina.

IV. Ideologias

En questa quarta part dein nus in'egliada sin las schinumnadas «ideologias» – en tudestg: Weltanschauungen. Ei setracta dad emprovas e sistems ord il temps niev e novissim per declarar il mund e la veta, sistems cun tendenzas religiusas, era cun ideas da provegnentscha buca cristiana ni giudaica; pia era tradiziuns e ductrinas ord religiuns digl Orient, p.ex. hinduissem e buddissem.

Cheu ein da numnar las ideologias dalla teosofia, dil spiritissem, dalla meditaziun transcendentala e dalla antroposofia.

Ual quella direcziun menziunada il davos duei fatschenṭar nus pli intensiv!

La «Societad antroposofica» ch'ei vegnida fundada igl onn 1913 ei colligiada stretgamein cun la veta e l'ovra da dr. Rudolf Steiner.

Rudolf Steiner ei naschius ils 27 da fevrer 1861 a Kraljevec en Ungaria; morts eis el ils 30 da mars 1925 a Dornach, el cantun Soloturn. Steiner ha absolviu la scol'aulta tecnica a Vienna ed ei lu staus sco giuen scienziat collaboratur digl archiv da Goethe e Schiller a Weimar. Naven digl onn 1902 eis el secretari general dalla secziun tudestga dalla societad teosofica cun siu center ad Adyar en las Indias. Igl onn 1913 daventa Steiner fundatur dalla «Societad antroposofica». Quella instituziun ha dapi igl onn 1923 siu center a Dornach, cun la scol'aulta libra per las scienzias moralas el Goetheanum. Da cheu anora ein el decuors dils onns vegnidas fundadas ed organisadas las scolas da Rudolf Steiner, era numnadas «Scolas Waldorf»: Rodund 130 scolas; vitier aunc ca. 250 sanatoris, clinicas e casas da pedagogia curativa.

Treis lingias principales el patertgar ed agir da Rudolf Steiner ein semussadas gia dapi ses giuvens onns:

1. Rudolf Steiner ha da giuven ensi schabetgs occults, visiuns immaginaras e sentupadas cun carstgauns gia morts e cun spérts dalla natira. El ei vegnius per tscharts dallas revelaziuns ord quei che schai davos las caussas ch'ins vesa e sa palpar, gie, da quei mund che stat davos tut e plaida tier ils carstgauns.

2. Rudolf Steiner, sez oriunds d'ina famiglia catolica, senta ina ferma af fezioni per il catolicissem, en special per il cult. El scriva sez en siu cudisch «Mein Lebensweg» (p. 22): Surtut impressiun fa sin el «quei ch'il sacerdot sco survient dil cult celebrescha e communichescha denter il mund sensitiv e quei mund che survarga nos senns».
3. Sco tierz punct ei da menziunar igl interess da Rudolf Steiner per las scienzias naturalas e la tecnica. Ual cheu, surtut ella geometria, vesa Steiner il mussament e la pusseivladad da far attents sin «las caussas ch'ins vesa buca».

Da cheu anora ei era da capir l'influenza da certas scartiras, special mein dils tractats da Johann Wolfgang von Goethe, sur dalla morfologia, vul dir la fuorma externa e la muntada interna dallas caussas entuorn ed en nus carstgauns.

El decuors dils onns sepresentan pli e pli clar ils elements principals dalla filosofia da Rudolf Steiner: La noziun dalla «evoluziun» e dil «jeu». Tras la capientscha digl entelletg human s'unescchan la materia ed il spért. Quei daventa cu il carstgaun vegn cunscients dil mund, el qual el viva. Il carstgaun «vesa» aschia sesez sco creatira cun entelletg. Ed entelletg ei libers, «pertgei ina creatira che capescha seseza sto esser libra» (Mein Lebensweg, p. 115).

En Jesus Cristus vesa Rudolf Steiner la culminaziun digl esser human. Tras il Cristus ha ei dau la gronda midada ella historia dalla carstgaundad, pertgei cheu, en quella persuna, ei per propri secristallisada la antroposofia, vul dir la sabientscha/savida dil carstgaun. Cristus, igl «ault spért dil sulegl», ei s'unius tier il batten el Jordan cun il Jesus da Nazaret. Suenter la mort sil Golgota e la levada ei quei Cristus restaus unius cun la part spirtala, buca veseivla, dalla tiara. Cheu, el schabettg da Golgota, vesa Steiner la victoria historica e cosmica dil spért sur dalla materia.

Quella filosofia ed antropologia da Rudolf Steiner ha giu ed ha aunc oz gronda influenza e consequenza el patertgar ed agir dalla «Societad antroposofica». Quei semuossa sin plirs intschess:

1. Cun las metodas e praticas da meditaziun.
2. Cun sespruar da surventscher in patertgar unilateral mo mecanic tras mussar si che tut las caussas han ina vart spirtala, buca veseivla.
3. Cun presentar in sistem da patertgar universal e compact.
4. Cun dar suatientscha al desideri dils carstgauns da penetrar en reginnavels che survargan ils senns da nies tgierp.

En puncts centrals semuossa denton era la cuntradicziun denter quei patertgar antroposofic e la cardientscha cristiana:

1. La religiun cristiana vesa en Diu il scaffider da tut veseivel e nunveisel, in Diu persunal ch'il carstgaun sa acclamar ed urar tier el. – La ductrina antroposofa enconuscha buca quei visavi: creatur – creatira, mobein il visavi da materia – spért.
2. La historia da Diu cun il carstgaun ei tenor las scartiras dalla Bibla in permanent dialog denter creatur e creatira. Quei dialog anfla siu punct culminont en Jesus Cristus, il Fegl da Diu ch'ei daventaus carstgaun. – L'antroposofia encuntercomi vesa la historia dil carstgaun sco ina cuntuada via al daventar materia, tochen tier l'arrivada dil Cristus ch'ha dau la viulta e meina al daventar spért.
3. Il Niev Testament dat perdetga da Jesus il Cristus (vul dir igl Unschiu), dil carstgaun da Nazaret e Fegl da Diu ch'ha purtau la nuviala dalla carezia divina, ch'enquera il carstgaun e perduna. Quella carezia ei secumplenida entras la levada da Jesus Cristus. – Per Rudolf Steiner ei Jesus in esser zun cumplicau. En quei Jesus da Nazaret ha «il sublim sulegl spirtal, il Cristus», priu per cuort temps dimora sin quest mund.

Quellas declaraziuns antroposoficas plaidan atgnamein surtut digl «esser» da Jesus Cristus, buca ton da sia ovra, numnadamein dil spin-drament. La ductrina biblica davart puccau e cuolpa e dil spindrament dil carstgaun tras Jesus Cristus vegn remplazzada ell'antroposofia tras la ductrina orientala dil «Karma» e dalla «reincarnaziun». Quei vul dir: Il carstgaun sto seperfecziunar tras atgna reparaziun da ses malfatgs e tras agen svilup cun vegnir danovamein sin quest mund, en in auter tgierp (re-incarnaziun!). Cun atgna prestaziun sa il carstgaun pia spin-drar sez.

Cheu cunterfa quella ductrina ad in punct central dalla cardientscha cristiana che di claramein: Nus carstgauns savein buca spindrar nusezs, nus essan vegni e vegnin spindrai tras Jesus Cristus, il Fegl da Diu.

V. Religiuns novas (Jugendreligionen)

Cheu setracta ei da novs moviments religius, da gruppaziuns e «sectas» che semuossan beinsavens sco religiuns da protest encunter las structuras dils stadis e da confessiuns – religiuns tradiziunalas. Talas «religiuns novas» ein per exemplu: «Hare Krishna», la cuminanza da «Scientology», ni era ils «Affons da Diu» (Children of God).

Enteifer quest artechel ei buca pli il plaz d'entrar era ellas ductrinas e praticas da quels moviments religius.

Ponderaziuns finalas:

Sefatschentond cun las doctrinas e praticas da gruppaziuns e cuminonzas religiusas e vesend actualmein moviments missiunarics era en nos-sas regiuns san ins mo constatar: Ils carstgauns enquaran, era en nies temps, in ambient religius, in dacasa per lur patertgar e sentir. Ed els an-flan gruppas e cuminonzas che paran da corrispunder a lur desideri.

A vesta pli vasta croda ei denton si che quels carstgauns daventan schi savens dependents, gie, magari schizun unfrendas da quei ch'ei ual, sco il franzos di «en vogue». Quei che sepresenta ual il mument pli u meins casualmein, para tuttenina da survegnir dimensiuns d'ina provi-dientscha e direcziun da sura. – Quei sa senz'auter esser il cass, ch'in ni l'auter senta siu clom per quella ni tschella decisiun. «Il vent suffla nua ch'el vul», aschia di Jesus a Nicodemus (Gion 3, 8). Mo schi savens eis ei semplamein il «niev», quei ch'ei aunc buca stau cheu, che ha sia attrac-zion. Ed ins ei era promts per alternativas, per quei ch'ei, ni para sil-meins dad esser auter ch'igl usitau e tradiziunal. – Eis ei veramein schi niev ed auter?

Quei che ha cheu muntada centrala ed ei segir era da veser sut igl aspect dalla divina providentscha ei la damonda fundamentala: Surve-schan tals moviments e promovan certas gruppaziuns veramein l'unitad da quels che serefereschan sin Jesus Cristus? Vegr ei buca scaffiu cheu plitost divergenzas e differenzas che cunterfan al spért da Jesus Cristus sez?

Igl apiestel s. Paul admonescha en sia brev a quels dad Efesus cun tutta detschartadad: «Sespruei da mantener l'unitad dil Spért tras il li-giom dalla pasch. Seigies *in* tgierp ed *in* spért, sco vus essas era clamai ad *ina* suletta speronza da vossa clamada. Ei dat mo *in* sulet Signur, *ina* cardientscha, *in* batten, *in* Diu e Bab da tuts ch'ei sur tuts ed en tuts» (Ef 4, 3–6).

Per quell'unitad e pasch ha Jesus sez urau ed el vul ch'ils ses «seigien units» (Gion 17, 12).